

七十二家集

江醴陵集卷之九

梁濟陽江淹文通著

明閩漳張燮紹和纂

表

爲蕭驃騎讓太尉增封第二表

臣某言以鉉司崇貴袞位淵嚴非德非功無忝
無濫故誓魂肆請舒衷仰謁不能曲流慈炤遂
乃徒洽恩獎周覽未交靈爽以懼臣歷古公圖
循遠訪繪未嘗不麗選袞台妙簡槐采者也魯

鄭之賢戚曹蕭之勲彥吳鄧之盛功王鍾之素
崇孔明之居蜀茂弘之在晉僉曰伊人是以處
無懦色臣官逢昌世運漸時明頻煩紫渥綢繆
璫命身薄施厚感厲愈深遂負機繩之託猥集
衡梁之任風軌不樹徽猷罕宣無以式翦寇兆
載弭姦萌致虹沴阻於上京蜺妖扇於下國寔
賴藩伯鞠旅侯甸入守攬槍旬始煙祛霧卷故
皇道威稜之由神緯昭昌之効臣豈有探叟察
幽之智攻城野戰之力哉今迹無小功事貽大

賞愧寤終朝慙夢流夜咨此庸弱何以任繁猷
惟淮泗猶梗趙魏未賓中原久蕪神州方翳思
樂盛猷願厲聲頌將陪雲驂以北狩扈朝服以
濟師乃爲少雪庸誠微謝天眷耳寧容遽竊茂
爵輕頒鴻名者乎伏願聖澤遐覃賜以矜宥霽
焉垂仁穆然惠德血祈旦亮慊志夕滿雖蹈疵
戾猶深并躍

爲蕭驃騎讓太尉增封第三表

臣某言撰心求私精衷請亮情不感神理無動
天詔飾旣降辭表是絕朱紱方臻金鉉未宥魄
慮再馳譊然改席臣局志久戰淺槩已領具煩
寸管備黷天史曠角浹景祈指遂宜猶謂設品
分職實以仰銓璧緯列寵縣榮故乃俯酌瑤陛
迹聯盈缺道協興降上睿所以僉舉前英所以
詳能今若第隨私貴爵與私富紊蕩邦經斷折
民紀豈可還風中葉逖聽遐代者也臣才乏往

賢績謝古烈妖鋒孽火將炎天地幸郊甸或靜
江田以闕文軒華劍旣榮旣峻侯封桂食又盈
又清祿高誚厚任重責深弱節兼誠誓思不淺
伏願隆慈特垂明愍臣奉國猶家慮公若私秉
軸之鈞心希在治不任懇懇之情

爲蕭太尉上便宜表

臣公言臣聞經邦緯治去華爲急體國字民循
素乃安聖誥遺風具騰丹冊賢言流沫備宣青
史何嘗不翦削浮奢銷遺文繪然後頌音載興
澤洽式廣楚駕百馬民雜國彫秦脩萬騎教亡
業墜刻桷丹楹禮有常序朱轡皂蓋古無濫秩
縹衣綸綬漢置前制奇服怪物周設常刑皆節
俗約訓及樸還風肅政黎心釐一民志故禮奢
寧儉宣尼之高風以義止利孟軻之宏規若乃

文彩利劍道鑒其元雕蟲篆刻世炤其淺雖儒
墨異學名法各治至於遵本捨末其槩一也故
荀韓之立典管晏之制書賈陸之鴻筆嚴徐之
博辭食貨興志鹽鐵生論莫不異說而同儉乖
議而共治然世淪物起道缺事遷蓋源起西秦
波被東漢一魏不變二晉未革所從來者遠矣
洎高祖武皇帝業高縣寓化格區宙菲躬謙度
方追重華納麓之勤約情撝操乃取文命卑宮
之義去金錦之巧無帷帳之飾唯脩遠圖綏國

之術祈勸力耕濟世之規是以政平刑偃紫階
斯廓太祖文皇帝恭已明臺之上聽政衢室之
下九官咸靜萬績惟凝亦復務抑華詔思裁參
太輿馬翠翟之麗渺歷乎外禁瑤碧綺組之玩
罕設於內宮故大德立而五路謐鴻名建而四
民寧者也自頃政教日替敦教月虧誰惟歷稔
亦曰淹紀至乃帝臺傾海外之寶王城盡天下
之秘象席珠履一躡而卽收鏤琴綵瑟再撫而
已損裴衣隨塵而罷羅袂從風而棄百民染其

聲奢萬姓被其馳蕩故園闢之里富者竊梁楚
之乘伎巧之家豪者襲王公之服於是有文靡
虛麗驕邪不典之器精纖空飾妙蠱非常之玩
農夫勤耨不克浮伎之資蠶女務織無給黠刻
之費將恐去實就華未知所徇背源從流不識
其止求國富兵強寧可得乎今江南所宅止漢
魏兩州之地戶口所檢裁文景三郡之民舊齊
故魯鞠爲茂草全趙盛魏豺狼所嗥陛下方欲
鳴鑾中土朝服濟河不改斯術則未見其可也

臣謬屬大任竊同憂忒時晏宵分實忘饑寢冀
治其勞職此爲先輒具條便宜可以安邦利民
者事事如右率以聞見謹簡聖聽若其咸允謹
請勅付外施行

爲蕭讓太傅揚州牧表

崇絕之寵降自白日殊甚之禮墜於青雲祇畏
駘盛若奪魂鑒巡席無容當軒改色臣聞天地
之大德曰生聖人之大寶曰位將以啓廓靈緯
崇樹神紀百司備列貴賤之分旣炳九官咸贊
升降之際可明故皇極不爽國步斯泰雖金縢
各政姬華異治未有華序變倫而能流英發耀
者也臣才慙右賢功愧上烈平趙夷魏之氣無
宣於國書濟河登山之威未亮於左史旣罕龍

輯金匱之効又乏楹間帷中之績衛主寧謂提
橫流匡危不足生細民故小節時顯於艱難大
勲無紀乎廊廟而乘輅服冕荷蕭張之賞開城
裂域受曹鄴之爵不能翊教緝政釐濟氓隱贊
邦弘化飾整朝輝是以德少寵多興人立規才
薄位厚處士興議故玉燭未調道治猶鬱者臣
之爲媿也不悟陛下復停日月之華凝煙露之
潤擢臣瑱姿鑒臣陋誠前恩未曠後寵已襲上
公秘鉞聲振都鄙文劍雕舄禮殊軒殿深褒之

逮方今爲絕大賚之降比古爲超臣亦何功當
處斯泰復願道邈先帝理鏡衆寂被氣順方涵
主獲慶特輟策書時停鴻冊則人歌僉平物抱
至歡

爲蕭重讓揚州表

臣某言臣以功狹賞峻世譖所譖才弱寵隆道
經所譖故爲冤誓膽庶留天矚圖驕慮蒲護守
私吝不能青蘋引風陽燧要景復降綸冊徽采
兼明影迹交戰水煙相薄竊聞周夏異章玄素
各禮儒道二宗名墨兩教咸以裕俗爲急僉以
得人爲寶於是尊官上品乃貽王振之賢鴻等
懋列爲取金聲之彥或有濟世夷難之畧輝耀
內區導江疏山之勤纏結中寓深德衍濫大功

振驚然後超居國右鬱處朝端故九職惟宣六
典式序丹青所以傳其謫磬管所以揚其音也
臣才蔽識淺非集譽於鄉曲榮降寵臻乃假翼
於皇極遂事等話言之寄任鈞負圖之重職忽
表裏地聯機務位班背良知闕萬脩居官不聞
其風處秩焉見其政寰域之治未緝街縣之訟
方興繒販之士無薦管庫之家寢寢四維不聞
五教罕敷安可以底慎財賦交正庶士者也今
輟和毗道及身替業尙據晦曉獲毗璇圖况異

禮更飾褒命復崇名超列辟爵擬羣后上仁居
之猶涵懃德臣實空儒伊何以勝旣誣人文將
黜玄緯凌歷飛流之背懼失正和晦裂蜺霧之
災且濫世物臣是以寤寐永歎憂國慮私者也
伏聞陛下裁天賦品制地平施使曠世之典不
遂臻於末躬迥代之軌無頓被於茲日素心丹
魄皦然靡疚矣不任憂迫之情

爲蕭三讓楊州表

臣公言臣再辭非謙重讓靡飾實以爵高中世
歷古所難寵冠上台絲代誰易詳圖辨箴如鏡
如水檢崖覽志匪雕匪文冀祈夢請駐心桂氣
陛下猶降以璽書之榮被以丹碧之采頓然變
容一慮九逝臣以爲寒暑繇乎平分晦明驗乎
天道咎譽起於微薄得吝生於小疵故金衡旣
陳錯髮之異必縣銅墨咸設分撮之殊已傾聖
哲不能爽鬼神莫由避况臣鄙槩早盈陋才久

溢第超庶后禮絕群班仰贊東序之賓平參北
宮之政窮盈極消於斯爲甚鑒茲隆替淵冰非
譬所以坐洞房而不悟下輕帷而嘆息也古之
馭教當有道焉量能而受賞撰智而錫位深乃
裂組遠故分珪前人以爲稱首昔賢以爲美詠
自非上德橫乎天地高績格于區宇烈譽馥於
一時茂名鬱乎當世者豈有降今日而莫先哉
臣爰蒙殊寄六稔遂交及荷忽任二燿忽周末
能塞謗生民獲免僮訟何盛勲之足題詎深烈

之可銘乎而因委忝濫踰濫倫等朱軒躍馬光
出電入貂冠紫綬寵霑霞炤臣聞闔宗奉國猶
非報殉方將身侍鑾華雪齊魯之侵地手執羈
勒驚燕趙之遠郊然後追迹范張濯纓汾射臣
之志也華爵盛典非所敢寧伏炤古巡將流聖
察無使匹槩血誠不諒於璿宸宏芬英猷遂蕪
於里聽豈伊庸臣獨蒙其庇亦曰海隅咸被其
利焉

爲蕭太傅謝侍中敦勸表

臣公言卽日侍中臣惠基給事黃門侍郎臣僧
珍至朱蓋乘雲玄軒肅霧墜高天之旨集微臣
之軀神爽矍然歛影無地臣初長血心未啓素
縑辭從意空言隨事盡不能降陛下一時之恩
借俄頃之炤遂枉近侍貂簪軼庭臣自亮無庸
何以集此退咎慊誠悲枉番光進戒朝訓虧茲
盛序感慮躑躅榮結夢寐臣檢古少例巡今逾
疑豈有妄明天功虛竊上賞近謬國華坐取隆

貴人見其過外惜皇猷內畏私情昔西京鼎秩
漢世權家丹墀網戶擊鐘連騎何嘗不以驕滿
貽戾謙冲要福者哉臣不能遵煙洲而謝支伯
迎雲山而揖許由激昂榮華之間沈潛珪組之
內光飾旣超寵靈亦遠江左已來罕見其倫今
位冠朝端通侯萬戶結象弭於前衡奏金管於
後陣都野宗其榮盛視聽驚其炎貴臣一旦居
之誰以爲不忝者乎而陛下猶崇以異禮者是
增臣之戾也况復肅延華勸實深窘迫伏願俯

於單志賜遂前請則世寢橫議臣蒙綬責

爲蕭望讓尚書敦勸表

臣公言臣五寫丹翹宜蒙凝炤一降王人遂無
蠲察復遣尚書臣岱兼侍中臣典等奉宣慈靈
重賜勉誨鏡伏廻環愀默失圖心魄交幪淵谷
匪譬臣自初被詔迄于今時載慙載疑以悚以
厲豈非深懼鴻典永憂未躬故琴瑟徒鳴不傳
廣樂之響燈燼空舉焉續景星之耀何則卓乎
小者不足以任大守于蔽者不可以語通臣器
乏淵源識暗機務倫濟夷險每憑璿曆之遠龜

拆氛蜺輒資羣才之効臣寧有採奇鑒隱之能
網國提民之功乎不謂過延渥洽謬攀河漢榮
宗益益寵華晬映藉聲探議共知其幸况傳保
之崇殷周特貴牧司之寄魏晉稱門上昭妙德
次擬英勲有踰茲序渺不紊裂今陛下方闢金
門之聽調繡辰之政何得去禮廢雅近於臣始
既無前章孰表後世臣才孤位峻待罪無日矣
情哀理感事盡於斯伏願一運天景微見藹心
則物不逃形臣何恨焉不勝焦憂狼狽之至

爲蕭太傅謝追贈父祖表

臣公言卽日兼謁者僕射姓名奉宣詔書追贈
臣亡祖某太常卿亡父某爲散騎常侍特進左
光祿大夫寵輝泉扃恩凝松石奉渥銘心祇光
勸憲臣行阻祇玄躬早荼棘如創之痛晷日不
追終身之恤霜露彌感雖慙曾輿喬木之敬實
抱仲路華轂之哀自謬藉珪金空貽組紱爵侈
於公祿盈於私何嘗不靜欬其結默慕交深不
悟睿孝動天昭性曠古惠被遠紀澤演慶世丹

情靡諒峻冊愈凝大榮集身尙驚異施况寵洽
山柏特振殊造銷骨瀝命猶不勝謝不任鯁涸
荷珮之誠

江醴陵集卷之十

梁濟陽江淹文通著

明閩漳張燮紹和纂

表

爲蕭讓劍履殊禮表

臣公言近仰跼威靈辭移理奪故欲冒忝傳識
必避殊禮不悟復凝令詔雕飾非常鏡睇未周
金火交慮臣聞寵以昭賢不濫才外之華榮以
擢身豈謀分表之渥哲后所以僉授貞臣所以

慎荷故行珪行玉尙無輕頒一爵一號猶宜詳
品况劍舄升陞贊唱異儀始爲對越神體抗禮
天極漢魏舊載唯斯稱重雖英袞邁朝賢武滿
世蒙此典者乃曠古時降耳諒由功饒賞結名
高器深金蟬綠綬未足藹其采瓊珮朱紱不足
宣其榮方加以履殿優以勿趨雖至第爲上公
貴爲皇王佇望茲禮猶邈如也臣何燁業寵兼
昔人受以懼覆悔豈有及復聞殊旨增其憂迨
抱此愚歎以殞爲請伏願天鑒順臣所守則雖

歿九幽傳榮萬葉矣

爲蕭太傅讓前部羽葆鼓吹表

臣聞國容軍禮旌羽昭其華品騎第乘鸞綈藹
其飾所以炎耀仙都崇麗神境世教以之垂彩
民聽以之流文故勒岫銘海之功輶革寫其詠
龕難夷邦之業簫管凝其聲朱鷺玄雲旣錫上
德華山芳樹以頒奇勲爰及台賢位高藩戚名
泐恩炤寵垂私賞皆爲發吹後陣豈曰兼奏前
軒茲典罕行此禮實曠臣竊服已弘叨光無限
才局秩遠常銜焄耀安可二葆同整雙弄頓驚

江醴陵集

卷十

三

覽躬惕然特貽厚謬伏願明燦日月靡忘情鑒
將停盛飾遂臣慊心則涵惠旣饒恭錫多矣

爲蕭太傅謝輿駕親幸表

臣公言近以神輿將降昌啓丹辭重被還旨未
垂闔允謙尊彌光褒優愈臨慙疚旣積敢忘謙
請臣乘幸藉私豈曰無僭攀霞鏡月非復常所
此必讓德信在於茲但恩嚴交洎固守莫從免
默恭典伊榮加戚寧容爰枉鸞駕式驚臣府訪
心驗已諒以不夷求物校迹誓無此義且古今
異飾紫青變禮取諸臣躬未覲其安伏願陛下
賜止冕輅時停雲駕則俗踐知方臣蹈厚泰

謝開府辟召表

臣公言近被詔旨賜令臣府自辟僚賢竊聞治
以才爲寶教以人爲貴激風揚蕤實資山東之
英凝華重馥良在關西之彥近以闡耀世經發
麗朝序而州策郡聘茲禮尙堙台召鉉辟斯文
亟暖豈非盛美難嗣故曠寂先芬者哉臣謬贊
國機職宜氷鑒未能澄形炤藝薦品任官旣乖
覆業彌感深寄仰屬皇心遙覃察政洞俗弘此
懿典崇臣遠寵輒祇睿恩謹宣巖壑庶幽居之

士羅薛可卷奇武異文無絕於古

爲蕭上銅鐘芝草衆瑞表

臣公言臣聞象際玄通豈以明昧阻運幽崖遙
鏡不以人靈異謀威書壁誥旣信其綵綠鱗丹
字彌驗其文是以業藹鴻經則煙露呈炤精昭
景緯則川岳發華故寶鼎白雲瑞集軒世芝房
赤鴈祥委漢年玄石鴻鐘遠炳晉室玉璧彝器
近耀皇宗自大明乘規泰始疊矩朱髻素毳之
至史不絕書奇葉珍柯之獻府無虛月今懋曆
啓圖靈基再固頃歲以來禎應四塞近獲豫州

刺史劉懷珍解稱所統建寧郡建寧縣昌村民
於萬山中採藥忽聞異響從石上得銅鐘一枚
長二尺一寸遠象古鑄近乖今製又州界之內
樹生連理二木隔澗滕枝相通越壑跨水合爲
一榦方之舊說彌復爲貴宣城所統臨城縣山
中獲草一株交柯攢莖紫蓋黃裏貞潤曄曄自
然天華採輟歷時質色不變

炳據有徵

近獲吳興太守臣王奐云十一月二十九日解
所統長城縣令臣張撫解稱其月二十五日其

露降縣東界下山之陰又東太守臣腦解所統
武進令臣紀法宗云十一月十日解稱其月二
十四日甘露降於彭山松樹至元日又降如初
臣以祥緯雜沓星燭波連斯乃靈迹深覃睿衷
夙感應應寫順祇無涵秘稽徃徵古僉欣升泰
瑤光日開玉繩永休謹拜表遣兼長史參軍臣
姓名奉銅鐘芝草以聞

爲蕭讓太傅相國齊公十郡九錫表

非常之冊分天而降冠古之典開河而出遙然以慙竟交象魏臣聞日月權輿二儀所以克靈君臣設極三統所以式固惟生與位謂之大寶辨諸文而尊卑旣炳觀群龍而貴賤可正雖復殷因於夏王資於帝至乎建侯分職體國經野其揆一焉是以二周之始山河逾廣兩漢之初封賞彌盛然表東海者實牧野之日瞻魯邦者乃負圖之辰西都英相信命世之功關中上宰

亦寵亂之力和鬯彤弓本西伯之賞虎賁戎路
又晉公之典若乃衣裳盟會九合一匡猶慙德
斯禮也臣實鄙才靡識大體徒以忠貞爲槩而
勞不足銘雖以丹素爲誠而功無可勒豈有經
天緯地之畧探隱炤寂之智哉抑亦何術以堪
盛休是以覽雲際而懷古憑軒楫而未寧也伏
惟陛下神華馭世理無不鏡賜臣待謗今職守
其私滿則天下有道庶人不疑矣

爲蕭讓九錫第二表

臣公言臣近勵心罄辭寫情畢議眇望神藻鑒
見丹襟而帝閑以祕綸詔方明戶外卷容左右
軫慮臣以爲麗天秉經君上之彝憲儀地執緯
臣下之恒軌故皇極載凝庶士交慎昔者重黎
効官裁居炎冥之職義叔能任方掌日月之序
至乎御龍勤夏未聞冠俗之爵大彭翼商豈見
超世之典以古先哲后如茲之慎賞也臣乃謬
貽國寄志在靖難若夫野戰虹蜺伏順者易爲

威城攻鯨虺奉國者理必全雲氣薄蝕下民咸
貴更明特險輿馬舟中皆可異議故昌邑有歸
耶吳楚無旋師斯激芬楊荑物同其幸焚惡去
醜世共其庇實爲仰憑俯順之効臣亦何力之
有焉竊謂祿爲卞郡必俟禹迹之勤錫以九命
乃須周公之美况呂梁不鑿而噐重玄珪越裳
未獻而賦擬千乘京關識其崇貴畿服知其忝
冒鏡前脩而慙形覲徃德而聳慮畏崖之請取
譬深水審量之祈呈炤皦景伏願陛下遠牽雄

艷近覽英規憑霞停詔歸風輟恩豈伊愚臣方
被冒化具日遺氓咸蒙其賴矣

爲蕭謝百僚敦勸表

臣公言臣欸誠素履頻載縑翰天節高獎累降
史筆卽日尙書臣某等至重宣詔旨猥辱百僚
省睇未交心靈已悸臣聞良宰謀朝不必惜威
貞臣衛主脩已則足故驕滿之失取鏡函關謙
側之美見炤伊闕臣本庸人識無遠度值開關
之辰遭攙拾之運姦回內壘則戮力瓊都諸侯
放命則抗節瑤祀秉號仗義幸不辱威皆爲晁
旒遙鑒之明群士畫圖之助臣寧望伊摯叔旦

之爵呂牙申甫之賞哉方欲謝簪東都濯冠汾
陽不悟盛禮華典復臻於茲靜默廻環祇畏鄧
攔猶謂遇聰明之朝當時雍之世陛下詠堯風
之化歌卿雲之詩日月華采萬方獲性疊慮仰
祈必蒙題品而威嚴竊絕斯冀遂阻鑾輿玉駕
復許敦幸重臣愆悔無地自安便當謹恭鴻命
竭身爲限

蕭相國讓進爵爲王表

臣結慮歸請三辰未鏡傾竄仰視九天彌阻重
躬徽策非晰光誥理晦情震若涉嚴淵臣業不
出世績未逮古謬藉明政陳力就列艱多智寡
朝贊罔樹若乃洪範不脩鍾繇旒之日九黎亂
政當摧軸之辰雖瀝命奉時禍提下亟防明之
陋貽慙昔人杜險之蔽取愧前英故十萬之師
無集豪衝之邸千金之貴恒單白藏之府戈船
發於江湖戎車出於石城然後雲徹席卷虔劉

臣禍臣實惡焉不悟上賞亟降華爵必集雖延
首紫紱艷意辰居執爲守約之志旣謝簡鑒避
賢辭智之請終無開允故受任專征遠邇知寵
華封四復侯甸推禮昔虞思勤夏不列殊物之
錫晉叔匡罔登頒上公之典燕藩懿親裁蒙袞
舄之榮榮國戚屬方忝旌旗之貴而臣包括庶
揆惣納儀刑益出近古非三代之遠體也乃踰
九命爰超五等域中之稱麗天作則探情顧抱
豈所允安者哉伏願陛下下一檢丹崖遂臣慊心

無使林逋深貽疵戾

爲蕭相國拜齊王表

臣無佐夏匡殷之功威晉服楚之績業不題於
宗器聲靡記於彝典而超居上禮邈乘峻爵靜
念隆替焦原非譬臣以爲衆官咸事帝謨所以
式序羣后克讓王猷所以載穆况臣訪德語勤
未泊伊稷之能藉靈懷寵仍濫周邵之秩故臨
蒐仰請瀝意歸聞理竭素牒事罄丹史具徽太
微備簡玉繩而才輶志淺隔景絕照朱輪之使
日月亟紆金鑾之尊旦夕將拂巡情覽識豈伊

寧處今便肅典內軒恭服外屏大夫有命古或
無違王假有廟今臣爲叨三省空懦震據于心

爲齊王謝冕旒諸法物表

臣王言以軒冕雲趾旣非常之飾宮懸玉戚乃
配天之禮故呈襟効慮必期蠲亮重被還旨芳
訊愈越鏡伏殊私情影遠震昔大啓營丘未脩
樹羽之賞光宅曲阜始兼龍旂之貴况道狹慶
隆身薄器尊粉繡爭輝藻火競耀夫太常圖列
星之采華蓋觀古人之情所以聳絕百縣崇隔
萬寓鳳閣因此而神瓊都由茲而麗故醜功慙
德違議避榮誠不遙乎理無復達遂貽嚴誥爰

斷辭表驚慄遲迴祈鑒何地便當肅對王休敬
昭異寵佩服盛文以慨以懼

爲齊王讓禪表

陛下遠規唐虞永揖之典近慕漢魏高謝之禮
既覽金水昏明之數又協雲雷隆替之徵激風
太上崩采至公聞命驚爽心靈殞越臣聞天地
草昧而樹之君所以平對二儀顯臨萬國膺符
受曆愍明司幽軒轅陟祚首出庶物顓頊登庸
作爲民紀雖五德迭興十代繼運非賢非睿莫
預斯位若乃與能之交禪錫之會豈伊虛薄所
可遵擬昔傳巖佐商秩終上公礪溪翼周名極

江醴陵集

卷十

列伯臣才非半古功愧逮聖獄訟不徃謳歌寧
歸河乏馬圖之寶天無乘龍之錫元首股肱誓
不可異而曠乘之軌忽臻於茲慙慨憂灼罔識
其際伏願陛下遺舜禹之心臣守巢由之節則
道耀日月澤浸飛泳聲振開闢仁動今古四三
王而六五帝不亦休哉

江醴陵集卷之十一

梁濟陽江淹文通著

明閩漳張燮紹和纂

章

爲建平王拜右衛將軍荊州刺史章

珪冊停徽車旗寫曜襲禮炫衷迎恩震色臣聞
爵以能委命以績降亦有玄雲結吹褰成燠之
厚朱箱累轍崇試宰之高而臣紐組願守要玉
備政績廢江區聲隘河部浮榮曠年叨光賒日

諒以具察輿歌取鏡民誚不悟皇德至凝亭物
帷幄復使承官楚封祗秩漳土任班河冀事亞
峭陝橫術輻湊殷民訟積寧曰明哲疇克勝寄
雖瀝丹局終懼蒙咎不任銘戴匪處之情

爲始安王拜征虜將軍南兗州刺史章

絢服騰炤懋開凝芬帛對迷墜慙泣交集臣職
右南陽謝蒲鞭之政任重臨淄無遺獄之化自
分金帝闕參風尹訟璧緯裁復圭露詎淹不悟
是靈拂采霄景汰色復交書河楚置傳江吳環
章清潤旂文肅路寵艷內維榮炫外囿方梗名
慮有陋莘識冲生覲氣安以輪謝不勝荒震屏
營之情

爲始安王拜征虜將軍丹陽尹章

旣耀軒禮涵綈龔恩爽泗覲默臣少識猶晦哀
辛方襲藉以毓采上霄搏華中漢飲惠延光偁
爵假息不悟璿離降暎繩河低文遂翊言關禁
徙第京鄙進憲蒙淺塵紊徒盈還迷懔悚風製
罔嗣循伏憂歆滅慮焦衷不勝荷佩之情

爲建平王慶少帝登祚章

上書皇帝陛下伏承肇嗣天震雲飛璿極戎夏
歸服民靈以戴臣聞黃旗紆藻璫益於姬帝紫
雲垂蓋効異於劉后實乃深賜天衷廣映祇迹
伏惟陛下壽英駕聖涵靈縱膺矩心明裁繩道
詰時遷裔維符雜沓河紐是以膺符寶宮輯命
珍殿誼洗雲密德徽嫺夏濬發鴻原長禘偉業
方絢聲金圖騰華玉曆波泮下氓炎躔上漢臣
公萃締寵誠兼親屏禮升之日守官楚甸不獲

勉躬儲外奉顙行間魂泣江郊心泫京國不任
悲仰哽憊之情

爲建平王慶王太后正位章

上書王太后殿下伏承以今日淑辰曾光樞景
慶芬祇外禮蔚寰中臣聞道懋第昌業廣祉盛
藻秩攸臻憲章斯飾伏惟殿下柔明固天夙資
龔懿芬惠翔聲端簡散譽冠采摯姪騰耀徽妙
丹陵蘊德玄丘棲聖煙煴國牒衍溢民聽涵道
席教且詠且洽臣忝任蕃圉無由隨例闕廷不
勝荒情

爲建平王慶江皇后正位章

上書皇后殿下伏承以嘉月蕙時膺曜宸正翠
珩炤品綸組在飾休邁函夏譽殷靈昧伏惟殿
下岳壝靜德式懷謙順升降圖傳左右詩史夙
鏡茂資早摘芳訓故以騰馥秘閨寫問中帷今
靈緯載升榮正輝典衍教紫庭麗軌華屋聲激
綺組風偃家邦黎玄湊仁雲祇宅慶遠邇有聞
莫不傾渥臣限外任無由恭列軒屏不勝荒情

爲蕭領軍拜侍中刺史章

上書皇帝陛下卽日詔書以臣爲侍中驃騎大將軍開府儀同三司班劍三十人等持節都督如故峻命在庭光冊克軒虹驂聳服朱輜佇蓋寅對以懷心影若傾臣功乏至道不足以題象魏績非振民無可以書廟閣半漏未晏中鐘而驚實忌微庸起乘盛服竊疑國寵頓萃末躬今寰海順典瓊都咸光調御惟新鎔製就始良宜整變獻經詮明典緯九河式耀三辰載晰不愷

陛下皇靈曲溢大賚斯降而鴻賞之行廻於臣
始非所以騰振遙風激昂品流與人之誦具聞
其黷頻露懔祈未叨鑒順今使虔禮青軒謹躬
丹墀憂符怵惕屬兼軫不任屏營之情

爲蕭拜太尉揚州牧章

玄文旣降雕牒增輝禮謁前英寵華昔典仰震
威容俯慙陋識心寬戰慄若殞若殞臣景能驗
才無假外鏡撰已練志久測內涯故讓不飾迹
辭非謙距寸亮尺素頻觸瑤纈丹情實理備塵
珠冕而神居寂阻九重嚴絕徒懷漢臣伏闕之
誠曾無魯人迴日之感所以迴懼鴻威後奔殊
令者也旣而永鑒隆魏緬思宏晉國之大政在
功與位故治民紐亂不處輿臺之下去勲捨德

寧班衮司之上咸以休對性業裁成器靈詎有
移風變範尅耀倫序者乎臣績不炤朝忠豈宜
國名爵赫曦僊俛優泰陛下久超異禮之榮越
次殊常之秩雖寢寐於戰曲垂哀亮而璽冊冲
正愈思繼嗣今便肅順天誥恭聞睿典審躬酌
私必敗危撓將恐民俗由此方擾軌訓以之交
燕臣豈不勉智罄忠未知所以報奉淵聖輪感
霄極取諸微躬長爲慙荷

爲蕭拜相國齊公十郡九錫章

殊命寶典鬱降雲天采詔綺軒光流城禦震驚
華體神氣交越臣才謝深英氣慙遠度進寡兵
車召陵之盟退靡朝歌河內之會無東馬山戎
之績懸車流沙之功故望寵未安踐榮加懼况
納陛朱戶事絕群班金璽綠綬儀參鴻典聞命
屏營以憂以墜近申微款日月之鑒旣阻方懼
難懷蘭芳之旨愈峻遂致百辟卿后踟躕於衛
闕鑾輅旗旂方幸於臣府悵然遙慮將貽厚戾

文章徒單迄無蠲省而天威咫尺丹懷罔固輒
肅恭文物翹拜榮禮違距以深追憎怵迫德輶
寵盛於斯爲微非臣鄙虛所能酬對

符

尚書符

侍御史大夫尊冠賤履君臣斯位愛順惡逆成
敗可曉未有憑凌我江郊侵軼我河縣而不流
冤漂骨丹宗血祀者也沈攸之寂寥無聞起自
甲卒邀我百戰之軍乘彼一捷之幸鑄山裂地
紐紫要金擁旗藩伯便無北面之禮受符方屏
卽有專征之釁箕賦深斂毒被南郢枉墨矯繩
害著西荆鬼怪其性故從始而遂終狼戾其志

乃公少而得老山陵不奔移殃爲慶踐祚無賀
按劍稱予遂乃關馳逆書亭炤妖火此而可賒
孰不可宥今遣陳承叔彭文之等敢勁三萬前
驅電躍呂安國任侯伯垣崇祖曹虎頭等樓艦
五萬射蛟中流荀元賓郭文孝程隱雋等輕舸
二萬高旌蔽日周盤龍張文嘉薛道淵等鐵馬
五千龍驤後陣凡此諸帥莫不氣薄日月精變
虹蜺或飲羽石梁或超踰亭樓索鐵拔距孤視
萬旅顧眄則前後生風暗鳴則左右激電然

鑾戎薄臨驍虎百萬六軍徐軌五輅遲旆丹艦
發炤素甲生波樓煩白羽投鞍成岳漁陽黑騎
浴鐵爲雲於是高山與深谷共湮紫芝與白艾
同滅不亦惜乎符至之日幸加三省其驅逼寢
手之人鋒陣塢壁之主若有投命軍門一無所
問或能因罪立績賞不示私斬祛射袂唯功是
與購募之科具列如上信如白水皦然無二臺
明詳旨飛火普加宣下文書千里馳驛

奏記

奏記南徐州新安王

伏惟明公殿下列譽椒壁蜚聲冲漢爰求儒雅
傍招異人削赤野之玉翦燕出之金至如淹者
東國之徒步耳方歛影逃形匡坐編蓬之下遂
遭煙露餘彩日月末光惟恩知泰變色薰心淹
聞齊石旣撫無待巴人之唱栢臺已構寧俟不
才之木淹幼乏鄉曲之譽長匱芹藻之德豈宜
公璞鄭氏獻鳳楚門哉願避職吏緩其召書

牋

到主簿口請建平王牋

淹乃庸人素非奇士旣慙鄒魯儒生之德又謝
燕趙俠客之節徒以結髮衛次暫聞仁義常欲
永辭冠劍弋釣畎畝而身輕恩重猥奉末光枉
白璧之惠降黑貂之私因茲感激未能自反負
金韉于淮吳從後車於河楚竟不能曜丹艘騰
英聲絕白雲負蒼梧至可知矣不謂咸池再暉
璿光重照開高天之慈布厚地之施承命以驚

巡走且失淹聞古人爲報常有意焉至乃一說
之効齊王動色一劍之感趙王解衣孤心廻槃
有殞自天

被黜爲吳興令辭建平王牋

迹本遷徙之徒非有儒墨之能亦以轉命溝壟
青瑣巖下誤得步脩梲循高軒伏層檻坐曲池
望星河之潤降璇日之光載筆奉后盛飾立朝
於山東百姓亦已殊甚雖螻蛄蟻蝼拭黃塵不足
累寒惠而小人狼狽爲寇爲賊山淵所容衣劍
不貸黜諸幽圜皆非報責仰遭大道之行草木
勿踐輟鏹歛火吹魂拾骨濯以河漢之流曝以
秋陽之景叢然黔首豈不載天竊思伏阜九載

齒錄八年以春以秋且恩且顧竟不能抑黑質
揚赤文抽精膽報慈光而自爲擁腫之異木卒
成踴躍之妖金所謂孽由已作匪降自天猶沐
造化餘靈宥以遐邑方蒙被霜露裹糴洲島缺
鑿山楹爲室永與鼃鼃爲羣猶蹶者不忘起盲
者不忘視况罪流朔方尙駐一等之刑咎過朱
崖猶緩再重之施金石無知何以識荅昔河濟
荆吳必獲陪從京輔關轂長奉帷席德音在耳
活言如昨淹迴梁昌自投東極晨鳥不蜚遷骨

何日一辭城濠旦夕就遠白雲在天山川間之
眷然西顧涕下若屑

到功曹叅軍請竟陵公子良牋

竊惟明使君鉞下道耀神源德鑄靈極誕涵天
聽資河炤聖譽拂絃外芳激震中故衡梁孕秀
璚璣流品變瑤光之暉贊玉燭之色功邁翊殷
績起匡漢是以赤瓊瓊寶之文睇影而夙集青
龍遺風之乘晞光而遠至如民者蓋不足筭所
志不出繒販所學不遺祝筮業興儒墨行乖曾
史旣乏脩短之術又慙啓塞之辨不能伏軾躡
衡驚燕趙之郊黃金橫帶馳澠溜之幣語默罕

緒圓方靡樹謬以一氣之微微百載之會窮奉
英睿身蒙青鑒故以潤厚累璧恩重兼金不悟
懸黎降景靈河瀉澗復獲執羈蘭陳迎笏桂序
漏越之琴竊莊文之價缺齧之劍盜頃襄之名
心羞秦媵志慮楚犢抱魄踴躍憂集如熏鑄感
何日銘報焉期